


**Li Laus**

A yellow starburst logo with eight points, centered on the page. The word "Felibrige" is written in a blue, serif font across the center of the starburst. The background of the starburst is filled with a pattern of fine, horizontal lines. A faint, diagonal watermark reading "Felibrige Original" is visible behind the starburst.

**Felibrige**

**LAUS  
DE  
CLEMÈNT BESOMBES**



**Enri BARTHES  
Felibre Majourau**

**LAUS  
DE  
CLEMÈNT  
BESOMBES  
(1937 – 2010)**

**Cigalo de la Narbouneso**

Santo-Estello de Sant-Iriès la Percho

# **CIGALO de la NARBOUNESO**

**1881**

**Camille LAFORGUE**

(1829 – 1903)

**1904**

**Sernin SANTY**

(1850 - 1906)

**1907**

**Joseph SOULET**

(1851– 1919)

**1920**

**René LAVAUD**

(1874 – 1955)

**1956**

**Marcel SAINT-BEZARD**

(1910 - 1983)

**1984**

**Raymond BUCHE**

(1912– 1993)

**1994**

**Clément BESOMBES**

(1937 – 2010)

**2011**

**Enri BARTHES**

*Gènto Rèino, Segne Capoulié, Caris Counfraises Majourals, Caris amics Felibres, Donos e Segnes*

Lou drech francès enseño coussi passou lous omes :

*Le mort saisit le vif...*

Lou mort laisso tout, e n'en cargo lou vivènt. Lou Majoural Clemens Bezombos defuntèt lou 21 de decèmbe de 2010, e vèi, lou 27 de mai de 2012, la *Cigalo de la Narbouneso* que pourtavo es estado trameso, *lou mort a près lou viu*, l'un e l'autre s'encadènou per toujour.

Clemens Bezombos nasquèt lou 11 d'outobre de 1937 à Teissières de Bouliés departament del Cantal. Enfant d'Auvergno, enfant de paisans, la lengo d'oc dins soun parla cantalès restountiguèt à soun brès e ié defautèt jamai. A cinq ans, tant soulament, aprenguèt lou francès. Estudièt as escolos, al coulègi, à l'Escolo Nourmalo pels Mestres d'Escolo d'Aurillac. Pamens en fossos causos seguèt, el-mème, soun propri prouffessor, coumo *autodidacte*, et mai qu'aco un autodidacte *éclectique*, que soun esperit se pourtèt per estudia ounte li plasio, dins toutes lous lasses del sabé.

Per soun mestié seguèt prouffessor de coulègi, mestre en espagnol (cal dire pus-lèu *castillan*) d'istori e de geougrafio, enseignèt as drolles de Salers, pèi de Mauriac.

Venguèt lèu lou tems malastruc de la guerro en Africo del Nord. Une esprovo crudèlo per èl e per dono Monique Bezombos, nouvelament maridats, e per sa filho Christino, touto jouineto. Esprovo persounalo, car refusavo las circounstèncios de la guerro e lou fach mème de faire la guerro, e ço que n'en vesio. Aco lou trasfourmèt, aco li empurèt lou besoun de mai de justico e de mai de libertat. E se metèt dins la poulitico per oubra, mai councretament pensavo, à soun ideal. Se

presentèt as eleiciouns e lou metèrou counselhé del Municipe de Mauriac de 1977 à 1989. Aquí oubrèt amé forço e leialtat per lou Coumun, per l'educacioun dels drolles. Travalhèt a l'establiment de la Biblioteco municipalo de Mauriac. Se presentèt tabé, mai senso succès coumo counselhé general del departament.

Lou voulen segui dins soun obro felibrenco. Obro courto e pamens pleno. Estudièt la lengo científicament amé lou canounge Salvat al *coulègi d'oucitanio de Toulouso*. Entrèt dins lou Felibrige en 1962, noumat *Mestre d'Obro* en 1981, elegit coumo successor del Majoral Raimond Buche a la *Cigalo de la Narbouneso*, en 1990. Avio foundat en 1974 l'*Escolo felibrenco de Mauriac*, e en 1970 un groupe de mantenènço tradiciounalo *La Miramounteso*.

Obro d'escrituro per sous reculhs *Las Parpandejados* en 1986, *Des semailles aux moissons*, en 1991, *Lou Mouli de Blàsi*, et uno coulleiciou de mai de sieis-cens crounicos dins lou journal *Le Réveil de Mauriac*.

Obro etnoulougico per reculhi, counserva e faire viùre lous testimonis material e immaterials de la lengo e de l'irme d'Auvergno. Obro recampado dins *L'Oustal Rouge* de Mauriac.

Dins aquestos obros, Clemens Bezoumbos seguèt vertadièiroment *Felibre* per counserva, transmetre, aumenta et rendre viù le patrimoni d'Auvergno.

Quouro venguèt lou tems de la malautié e del vielhum, l'obro ero largado e la dralho douberto per countinui lou presfach. Douçomenet, lentoment, Clemens Bezoumbos, acoumpagnat per Monique Bezoumbos e per sa familho s'en anèt, pauc à pauc, e lou 21 de decembre de 2010 mountèt as aliscams de santo Estello.

Vous farai aremarca qu'avès balhat, caris counfraises, la *Cigalo de la Narbouneso* à-n-un rat (lous prouvençals dirioù un *gàri*) de bibliouteco, mai assabentat del sècle XIIen que de la literaturo d'aro. E doun-mai, la distanço de lioc e d'esperit me dessaparo fosso de moun predecessour...Regreti de l'avèire pas counescut. Cresi qu'aurien agut de passious semblantos: lou besoun d'aprene soul, la passiou de l'escrituro amé la plumo. Aurien agut en coumu lou plesi de l'acioun publico et lou servici dins lou Municipe.

Vouldrioi ramenta lou souvenir de cauques Majourals davanciés per la *Cigalo de la Narbouneso*: lous lengadoucians Camille Lafforgue qu'avio inventat lou bias de trata la vigno contro la *marrano*, Jousé Soulet pouèto setori, e lous mountagnols Serni Santy empuraire del Felibrige en Auvergno, Reinat Lavaud, e lous qu'ai un pauc counescuts Marcel Saint Bezard e Raimound Buche.

Rendèn oumenage fervourous al Majoural Clemens Bezoumbos, à dono Bezoumbos e sa familho, e as felibres d'Auvergno. Souvenen-nous que la *Cigalo de la Narbouneso* après avèire cantat de tems joust lou sourel del Miejour, se venguèt atravalhi dins vostros bounos mountagnos, avans que de tourna, aro, proche de Narbouno, e en Narbouneso proche del *mare nostrum*.

Narbouno, dedicado al dius Mars, *Narbo Martius*, Mars dius de la guerro, dius de l'esfors per apara e per counquerri. Narbouno capitalo de la *Narbonensis provincia*, que balhet soun noum à *Prouvenço*. Souvenen-bous de l'esfors, de l'irme e de l'eisemple del Majoural Bezoumbos e de l'Auvergno per oubra a la causo de la lengo e a l'espandimen de la doutrino mistralenco en terro de Lengadoc.

Per clava, aplicaren al Majoural Bezoumbos uno fraso de l'Escrituro sus lous defuntats:

*Sas obros seguissou.*

Gramàci.

Félibrige - texte original